

**2013-imut Aningaasanut Inatsisissatut siunnersuut**  
(Aningaasaqarnermut Naalakkersuisoq)**Saqqummiussissut**

(Aningaasaqarnermut Naalakkersuisoq)

Matumuuna Naalakkersuisut sinnerlugit 2013-imut Aningaasanut Inatsisissatut siunnersuut saqqummiutissavara.

Nunarpassuarni pisortat aningaasaqarnermikkut annertuumik amigartooruteqarfianni, uagut ukiut sisamassaannik aningaasanut inatsisissatut siunnersuut isertitassat aningaasartuutissallu akornanni oqimaaqqatigiissitaq saqqummiupparput.

Naalakkersuisut aningaasanik ingerlatsinissap aqqissuunnerani Aningaasaqarnermut Siunnersuisoqatigiit ukiuni kingullerni inassuteqaataat tusaaniarsimavaat. Nuannaarutigaa Aningaasaqarnermut Siunnersuisoqatigiit kingullermik ukiumoortumik nalunaarummini manna maluginiarsimamassuk, issuarpara:

*”Aningaasaqarnermut Siunnersuisoqatigiit siulittaasut isumaqarpoq pisortat aningaasaqarnerannik aqqissugaanerusumik, paasiuminartumik kinguneqartitsisumillu pilersaarusiornermut aqutsinermullu arlalinnik suliniuteqartoqartoq. Peqatigisaanik erseqqissaatigineqassaaq piumasaqaatit annertummata, aamma politikkikkut annertuumik tapersorsorneqarnissaat tunngaviulluni. Pisortat aningaasaqarnerisa patajaatsumik ineriartornerisa qulakkeerneqarnerat aningaasanut tunngasuni naalakkersuinikkut ingerlatsinerup atasinnaanerup tatiginartuuneranut pingaaruteqaannangilaq, kisianni aamma imminut napatittumik aningaasarsiornikkut ineriartornerup piviusunngortinnissaanut tunngaviulluni.”*

Issuaaneq naavoq.

Naalakkersuisut aamma naammagisimaarparput, akiitsunut aningaasaliinernullu periusissaq upernaq katersuunnermi saqqummiussarput politikkikkut annertuumik tapersorsorneqarmat. Ilaatigut atassuteqaasersuutitut suliniutit nutaat aningaasalersorneqanissaanut taarsigassarsinissamut atatillugu politikkikkut aalajangiinissamut tunngavissat piumasaqaatissallu periusissatigut aalajangersarneqarput. Periusissaq taanna malikkutigu europami nunat arlallit aningaasameernerat assigalugu nunarput aningaasamiilersissanngilarput.

Akiitsunut aningaasaliinernullu periusissaq peqatigitillugu aningaasatigut aqutsinitta nunatta ineriartorteqqinneqarnissaanut toqqissisimanartumik patajaattumillu atugassaqartissavaatigut.

**2013-imut Aningaasanut Inatsisissatut siunnersuummi qitiutillugit sammineqartut**

2013-imut Aningaasanut Inatsisissatut siunnersuut nangitsineruvoq, nunatta nukittunerulersinneqarnissaa anguniarlugu suliniutitsinnut pisariaqartinneqartunut amerlasuunut siunissamilu unammilligassatsinnut piareersaataalluni. Aningaasat annikikkaluartut suliaasaqarfinnut pingaartinneqartunut aningaasat amerlanerusut atornerqarput. Tamanna tulluussimaarutigisinnaavarput.

Isumaginninnermik suliaqarfimmi meeqqat inuusuttullu ajornartorsiuteqartut pillugit siusissumik suliniuteqarnissamut aningaasat amerlasuut immikkoortinneqarnissaat pingaartissimavarput. Tamannalu ingerlatiinnassavarput.

Ilinniartitaanermut tunngatillugu aningaasarpasut kollegiat, skolehjemmit ilinniartoqarfiillu allilerneqarnissaannut nutarterneqarnissaannullu immikkoortippavut. Aatsaat taama amerlatigisut ilinniagaqarnermik ingerlatsilersimapput. Tamannalu ingerlatiinnassavarput.

Peqqissutsimut tunngatillugu utaqqisut ikilisarneqarnissaannut pissutsillu nutarterneqarnissaannut aningaasanik immikkoortitsivugut, tassa innuttaasut katsorsarneqarnerminni sapinngisamik pitsaanerpaamik atugassaqaqtinniarlugit. Tamanna ingerlatiinnassavarput.

Ineqarnermut tunngatillugu suliaqarfimmi aningaasat iniutitta nutarsarneqarnissaannut immikkoortippavut, tassa inuit amerlanerusut ajunngitsumik ineqartinniarlugit. Tamanna ingerlatiinnassavarput.

Suliffeqarnermut tunngatillugu aningaasat suliffissaaleqisut ataavartumik suliffeqalernissamut piginnaangorsarneqarnissaannut atugassat immikkoortippavut. Tamanna ingerlatiinnassavarput.

Aatsitassarsiornermut atatillugu aningaasatigut atugassarititaasut pingaernerit attatiinnarpavut, tassa nunatta siuarsarnissaanut patajaattumik aningaasaliissuteqartoqartarnissaa qulakkeerniarlugi. Tamanna ingerlatiinnassavarput.

Suliniutit tamarmik ullumikkut suliassatta naammassineqarnissaannut pisariaqarput. Aamma suliniutaapput siumut isigisumik aaqqissuunneqartut siunissamilu unammilligassanut nunatta nukissaqartinneqarnissaanut pisariaqartut.

Aallarniineruvoq pisariaqartinneqartoq, tamannali naammanngilaq. Akisussaaffinnik tiguseqqinnissamut piareersimavugut.

Taamaammat Naalakkersuisut 2025-mut pilersaarut siunissami unammilligassatsinnut tunngassuteqartoq saqqummiuteqammerpaat.

### **2025-mut pilersaarut**

2025-mut pilersaarusiornikkut Naalakkersuisut takutippaat, suliniutit suut nunatta isumaginninnikkut, piorsarsimassutsikkut aningaasaqarnikkullu imminut akilersinnaasumik ineriartortinneqarnissaanut pisariaqartinneqartut.

Pilersaarutaavoq inuit suli amerlanerusut ilinniagaqarnissaannik pisariaqartitsisoq.

Pilersaarutaavoq inuit suli amerlanerusut namminersortuni suliffeqarnissaannik pisariaqartitsisoq.

Pilersaarutaavoq inuit suli amerlanerusut allanit pilersorneqarnermit imminut pilersulernissaannik pisariaqartitsisoq.

2025-mut pilersaaruterput 2009-mi qinersigattali suliniuterpassuarnik aallartissimasatsinnit aallaaveqarpoq. Aamma suliniutissanik nutaanik imaqarpoq, akileraartarnej, ineqarnej,

isumaginninneq pensionisiaqarnerlu pillugit ingerlatsinitta allanngortinneqarnerisigut nunatsinni inuttut atukkat assigiinnerulernissaannik qulakkeerisussanik.

Naatsumik oqaatigalugu pilersaarutaavoq tamatsinnut piumasqaatitaqarnerusoq. Nukissaqarnerit nammannerussapput, nukissakinnerillu piginnaanngorsarneqassapput.

2025-mut pilersaarutip partiit allat, suliffiutillit kommunillu peqatigalugit oqallisigineqarnissaa Naalakkersuisut qilanaaraat. 2025-mut pilersaarutitsinni saqqummiussatsinnit allaanerusumik isumassarsianut amnavugut. Aningaasat oqallisigineqarsinnaapput, anguniakkalli aalajangersimapput. Nunarput isumaginninnikkut, piorsarsimassutsikkut aningaasaqarnikkullu imminut akilersinnaasumik ineriartortissavarput.

Naggataatigut oqaatigissavara, 2013-imut Aningaasanut Inatsisissaq pillugu isumaqatiginninniarnissamut qilanaarama. Isumaqatiginninniarnierit qulakkiissavaat, 2013-imut Aningaasanut Inatsisissap 2025-mut pilersaarut peqatigalugu meeqqat meeqqat atuarfiannit ilinniartitaanermi aaqquussinermut toqqaannartumik ingerlaqqittarnissaasa qulakkeerneqarnissaa. Suliniutitigut aamma qulakkeerneqassaaq, angajoqqaajusut suliffeqarnissaat, soorlu suliniutitigut qulakkeerniarneqartoq aanaakkut aataakkullu toqqissillutik utoqqalinissaat.

Taamatut oqaaseqarlunga 2013-imut Aningaasanut Inatsisissatut siunnersuut Inatsisartunut suliassanngortippara.